



*Rabu, 30 Nopember 2020*  
**Ogen: Kejadin 26:12-25**



**Terus Rusaha**



Jangan menyerah' kata enda megati ibelasken janah jadi lagu si motivasi kalak sideban ibas erbage kecibal geluhna.

La sitik perbeben doni enda si erbahan kita menyerah, putus asa, bosan janah lanai erpengarapen. Ibas dampar keluarga, la sitik jabu, perbulangen ras ndehara menukah ngataken sirang, la lit perjuangan ndarami titik temu ibas persoalan siturah. Ibas anak si la megiken ajar, la sitik orangtua si ngelabuh seh sakit. Ibas dampar ekonomi, latih iakap ncukupken keperluan geluh, biaya anak sekolah. Dahin si la tentun, usaha si bangkrut, ulih juma la memuasken ras sidebanna. Deba lit seh erdaya juma, rumah, ntah mulih ku kuta erkiteken lanai terterusken ibas perlanjangen.

Renungenta wari enda nuriken kerna kegeluhen si Ishak, ibas jamanna geluhna tetap ipasu-pasu Dibata, amin bage la sitik tantangan sini adapina. Tep-tep usaha siilakokenna la sitik kalak si ercian ate sabab ulih siialokenna luar biasa ibandingken masyarakat si isekelewetta. Enggo piga-piga kali ia miser erkiteken cian ate e tapi tetap nge iusur-usurna dahin e, la ia leja, miser ibenakenna ka bage seh piga-piga kali. Payo banci saja la seri situasi ras perbebenta ras Ishak tapi geluh si simpar pe banci mperturah perbeben.

Jhon F Kennedy pernah ngataken 'Orang kreatif tidak lama mengeluh dalam kesulitan ia cepat menemukan cara mengatasi kesulitan'. Kata enda mpersingeti kita maka labo lit manusia si la ikenai perbeben ras tantangan. Cara manusia ngalakenca nge si la seri. Lit si mutar-mutar saja bas persoalenna, lit si tondel kujah tondel kujenda tapi lit ka nge kalak si minter idatna dalam puluh ibas kerina situasi si kuga kin pe sulitna. Adi sirenungken, siapa nge kita megati ibas ngalaken tantangan geluhna? Ula ngadi ibas usaha ras perjuangan. Erdalan ras Dibata.